

itidem duobus suis liberis qui leprosi erant, constructo hic Nosocomio, Gualterum filium Milonis Herefordiæ Comitis in partem hæreditatis suæ longe maximam vocavit. Illi successit Henricus frater à Wallis interfectus, qui in ejus terras involarunt, quas præfecti Regis non sine magnis periculis defenderunt. Per Henrici vero sororem ad *Breos*, & ab illis connubii jure per *Cantelupos* & *Hastingos* ad Reginaldum *Grey* Ruthniensem descendit: *Guilielmi* tamen de *Bello-campo* à *Greio* virtute cujusdam transcriptionis & conventionem recuperavit, & ille itidem, si proles ejus mascula deficeret, transcripsit in Thomam fratrem *Warwici* Comitem, & ejus hæredes masculos. *Guilielmo* de *Bello-Campo* Domino *Abergevenna* natus erat *Richardus*, qui ob virtutem militarem *Wigornia* Comes creatus, & Gallico bello occisus unicum reliquit filiam, quam *Edwardus Nevill* in uxorem accepit. Iam inde titulo Baronum *Abergevenna* claruerunt *Nevilli* (Castrum tamen diu ex illa quam dixi transcriptione detentum erat) Horum quartus nostra memoria defunctus unicum tantum reliquit filiam *Mariam*, Thomæ *Fane* Equiti aurato enuptam, inter quam & *Edwardum Nevill* Equitem auratum hæredem proximum masculum, cui ex testamento, eoque autoritate Parliamentaria constabillito Castrum *Abergevenna*, & pars hæreditatis longe maxima obtigerat, de titulo Baronie *Abergevenna* in Comitibus Parliamentariis anno *Iacobi* Regis secundo septem seorsim diebus ab utriusque partis advocatis coram Regni proceribus acerrime & doctissime disceptatum erat. Cum tamen juris quæstio non satis esset explicata, sed honorario titulo uterque dignissimus pro familia splendore singulis videretur, & certissimis constaret indiciis cum titulum Baronis *Abergevenna*, tum Baronis *Le Despenser* ad hanc stirpem hæreditario spectare: efflagitarunt à Rege proceres, ut utriusque Baronis dignitas restitueretur, qui libenter adnuit. Hinc propositum erat à Cancellario proceribus primum, an hæres masculus titulum *Abergevenna* haberet, vel hæres femella: plurimis placuit ut masculo titulus Baronie *Abergevenna* restitueretur. Cumque iterum propositum esset, an femellæ & suis hæredibus titulus Baronie *Le Despenser* restitueretur, consenserunt universi. Quod cum Regi declaratum, ille suo assensu regio confirmavit. *Edwardusque Nevill* regis re-scripto statim ad Parlamentum nomine Baronis *Abergevenna* evocatus, atque in trabea Parliamentaria inter duos Barones, ut moris est, introductus, & sede supra Baronem de *Audeley* locatus. Eodemque tempore coram regni proceribus perlectæ literæ Patentis, quibus Rex *Mariam Fane* ad statum, gradum, titulum, stylum, nomen, honorem, & dignitatem Baronissæ *Le-Despenser* restituit, erexit, præfecit, &c. habendum & tenendum prædictum statum, &c. præfatæ *Mariæ* & hæredibus; quodque ejus hæredes sint successive Barones *Le-Despenser*, &c. Nova autem suborta quæstione, cui prior locus deberetur, an Baronie *Abergevenna*, vel *Le-Despenser*; proceres hoc ad designatos pro officio Comitum *Marescalli* Angliæ examinandum retulerunt, qui re mature perpenfa pro Baronia *Le-Despenser* sententiam suis chirographis & sigillis consignarunt, quæ lecta coram proceribus, & in Diarium Parliamentarium eorum jussu relata, ex quo hæc compendio

Baronissa
Le-Despenser.

descripti. Hoc castrum (nec est cur tacitus præterire) tenuit *I. Hastings* per homagium, *Wardam*, & *maritagium*, cum acciderit (ut in Inquisitione legitur) & si guerra fuerit inter Regem Angliæ, & Principem Walliæ, deberet custodire patriam de *Over-went* sumptibus propriis, meliori modo quo poterit pro commodo suo, & utilitate Regis, & defensione Regni Angliæ.

Secunda urbecula, quam *Burrivm* *Antoninus* dixit, & ad duodecimum à *Gobannio* milliari ponit, sedet ubi *Birthin* profluens *Isca* commiscetur, *Britannis* hodie transpositis literis, *Brumebegie* pro *Burenbegie*, & *Caer Vske*, *Giraldo Castrum Osca*, & *Anglis Vske*, nunc solum castrum ampli & muniti ruinas ostendit, quod amœnissime intersidet inter *Isca* flumen & *Oihwy* rivulum, qui per *Ragland* elegantes Comitum *Wigornia* ædes instar castelli cursum ab Oriente sub hoc agit.

Urbs tertia *Antonino* *ISCA*, *LEGIO II* dicta, ad *Isca* alteram ripam duodecim exacte milliari-bus Italicis à *Burrivm*, ut ille notavit, distans, *Britannis* *Caer-Leon*, & *Caer Leon ar Vsk* appellatur, id est, Urbs Legionis ad *Isca* fl. à Legionem *Secunda Augusta*, quæ etiam *Britannica Secunda* nominatur. Hæc legio ab *Augusto* instituta, à *Claudio* è *Germania* in *Britanniam* sub *Vespasiani* auspiciis translata, cui imperium affectanti præsto fuit, *Britannicasque* legiones sibi adjunxit, hic demum à *Iulio Frontino*, ut videretur, in præsidio contra *Silures* locata. Quanta hæc *Isca* tunc temporis fuerit, audi *Giraldum nostrum* è suo *Cambria* Itinerario, Erat hæc urbs antiqua & autentica, à Romanis olim coctilibus muris egregie constructa. Videas hic multa præstina nobilitatis vestigia, palatia immensa aureis olim tectorum fastigiis Romanos fastus imitantia, eo quod à Romanis principibus primo constructa, & adificiis egregiis illustrata fuisset. Turrin giganteam, thermas insignes, temporum reliquias, & loca theatralia muris egregiis, partim adhuc extantibus omnia clausa. Reperias ubique tam intra murorum ambitum, quam extra, adificia subterranea, aquarum ductus, hypogæosque meatus, & quod inter alia notabile censeas, stupas undique videas artificio miro confectas, lateralibus quibusdam, & præangustis spiraculis occultè calorem exhalantibus. Iacent hic duo nobiles, & post *Albanum* & *Amphibalum*, præcipui *Britannia* majoris protomartyres, & ibidem martyrio coronati, *Iulius* scilicet & *Aaron*, quorum uterque Ecclesiam in urbe insignem habebat. Tres enim egregie in hac urbe antiquis temporibus fuerant Ecclesie. Una *Iulii Martyris*, virginum Deo dicatarum choro venustata, altera vero *B. Aaron* socii ejusdem nomine fundata, & *Canonicorum* ordine præclaro nobilitata. *Amphibalus* etiam *B. Albani* doctor, & fidelis ad fidem informator hic oriundus erat. Situs urbis egregius super *Oske* flumen navigio mari influente idoneum, sylvis & pratis urbs illustrata. Hic magni illius *Arthuri* famosam curiam legati adiere Romani. Vbi & *Dubritius* Archiepiscopus *Davidi Menevensi* cessit honorem, abhinc *Meneviam* Metropolitana sede translata. Hæc *Giraldus*. Sed ad hujus antiquitatem asserendam antiquas inscriptiones quas hic nuper effossas Reverendissimus pater *Franciscus Godwinus* Episcopus *Landavenis* venerandæ antiquitatis, & optimarum literarum cultor eximius, mihi pro sua humanitate impertivit subjungendas curavi. Anno *MDCII*, in prato adjuncto reperta à fossoribus fuit effigies succincta & pharetrata, capite, manibus, & pedibus truncata super pavementum tessellatum, & fragmentum aræ cum hac inscriptione literis triuncialibus,

6. Edw. 2.

Burrivm.
Vsk.

Stuphæ.

K k k k

bus,